

Yungzsuij “Vuengzvenz”:

Vwnzva Myauzcuз “Cienz” Gokgok

融水“芦笙王”：苗族文化声声“传”

□ Liu Swjyenh raiz Dahdingz hoiz



▲ Biujyienj boq aenvenz daegsaek naekgywd.

▲ Liengz Bingjgvangh (gvaz) gangj gij fap guh buqgienh aenvenz hawj bouxcoz Myauzcuз.

◀ Vuengz aenvenz Yungzsuij ndaej baenz fanh vunz cimyawj.



▲ Liengz Bingjgvangh (bainhaj) langhbajj dinfwngz guh aenvenz Myauzcuз.



▲ Dahsau Ranzmyauz boq aenvenz haenx gie evaeunde.



▲ Saefouh aenvenz cingq guhyiengh cang guenj aenvenz.

Bi 2008 ndwen 8, vih angqhoh Baekging Auyinvei haimuq, aen “venzvuengz” sang miz 10.5 mij, naek miz 219.5 goenggaen, daj bwh caizliuh daengz guh baenz, yungh bae ndwen lai seizgan ndeu, youq gwnz aen hozdung angqhoh Baekging Auyinvei haimuq youq Yungzsuij Myauzcuз Swciyen banh haenx “lohnaj”, yinxhwnj gingdoengh; youq mboengq seizgan Baekging Auyinvei haenx youq Yungzsuij Minzcuз Gvangicangz langhbajj, vunzlai cungj bae cimyawj.

Aenvenz heuh vuengz ndaw vuengz daihneix, aenvenz ceiq hung gwnz seiggyaiq neix, cingq dwg youz Liengz Bingjgvangh boux saefouh Myauzcuз guh aenvenz okmingz neix daegdaengq cauhyuh.

Liengz Bingjgvangh, vunzlai heuh de guh “vuengzvenz”, vunz Yungzsuij Myauzcuз Swciyen Anh-cuiz Yangh Vuhgiz Cunh Mbanj-nganzbanj, aenvih gij dinfwngz boq aenvenz caeuq guh aenvenz ak, bi 2012 ndaej Vwnzvabu ancoh baenz bouxswnjcienz daiqbiusinq feih vuzciz vwnzva yizcanj hanghmoeg guekgya gaep. De seizneix yaek ndaej 80 bi lo, lij ciuqyiengh youq ndaw mbanj Myauzcuз byaraemx gyaegyang haenx soujmaenh aen loq-sienj aenvenz de.

Gicej bae caijfangj Liengz Bingjgvangh, lij caengz haeujdaengz ranz de, couh ndaejni gij sing aenvenz yaep daengx yaep yiengj. Haeuj daengz ndaw ranz, youq doiqnaj baiz aenvenz guh baenz liux ndeu, boux goenggeq saeknaj hozswnh ndeu dawz aen gingqda dava, cingq baez dem baez sawq boq aenvenz, caem sim roengzdaej nyinhcaen dingq, sijsaeq doxbeij gij cabied saeq diuhsing.

Liengz Bingjgvangh naeuz, aenvih daj iq dingq aenvenz majhung, de daj caet bet bi couh hainduj boq aenvenz, doq dingq doq yawj doq ngeixnaemj saefouh ndaw mbanj baenzlawz guh aenvenz, cibroek caet bi couh ndaej guh saefouh lo.

Vihliux hwngfat gij dinfwngz aenvenz, Liengz Bingjgvangh yungh le haujlai goengrengz. “Aenvih guh aenvenz mbouj canh gijmaz cienz youh saepsoiq, bouxcoz hix mbouj haengj hag, daxboh gou ciengzseiz caeuq dou mboen, you daengzcog gij dinfwngz neix mbouj miz vunz swnjcienz roengzbae.” Daeglwg ngeih de Liengz Suiveih mwhgonq youq dieg rog dajgoeng, geij bi neix daej ndaej daengz Liengz Bingjgvangh daiqdoengh, dazyinx, bienqbaenz bouxbangrengz de.

Vihliux gyavaiq gij yauqlwd

cauhguh aenvenz, bi’gyai, Liengz Suiveih bae Guengjdoeng gaujcaz le, cawx ma dauq gihgi deugaek yungh susw gungci ndeu, caeuq daxboh yenzgiu yungh gihgi ma guh aenvenz, seizneix gaeng guh baenz haujlai aen lo. “Gawq faexndoeq, dat naeng, mbongq aendaej aenvenz……Ndae yungh gihgi ma guh, seizgan noix youh mbouj yungh geijlai goengrengz, aendaej aenvenz baenz yiengh liuxle, caiq yungh fwngz ma gyagoeng, gij sing aenvenz guh okdaeuj haenx caeuq aenvenz doenghbaez cienzbouh yungh fwngz guh haenx mbouj miz cabied.” Liengz Suiveih naeuz.

Ciuq cam rox, cawz daeglwg ngeih Liengz Bingjgvangh ciepswnj gij saehnieb daxboh, 60 lai boux lwgsae de son haenx gaengq bienq-baenz saefouh, faenbouh youq gak dieg Mbanjmyauz, bienqbaenz gij rengz ceiq youqgaenj genhciz swnj-cienz gij vwnzva aenvenz Myauzcuз. De caeuq lwgsae de moix bi cauhyuh 800 lai aen aenvenz, seizneix Guengjsae caeuq Gveicouh song dieg miz 5 fanh lai aen aenvenz dwg gyoengq de cauhyuh. “Ndawsim gou maij, miz saek ngoenz mbouj lumh aenvenz couh raen youq mbouj onj.” Liengz Bingjgvangh naeuz, cijaeu bouxwnq lij ra de guh, de couh itcig guh roengzbae.

Bi’gvaq ndwen 9 ngoenz 16, Yungzsuij Myauzcuз Swciyen banh aenban son’gyauq gij dinfwngz guh aenvenz Myauzcuз. Baez son’gyauq neix dwg youq ndaw aen gvanj langhbajj dinfwngz swnjcienz aenvenz Myauzcuз Liengz Bingjgvangh bouxswnjcienz feih vuzciz vwnzva yizcanj guekgya gaep neix haiban, 15 boux bouxmaij aenvenz Myauzcuз camgya baez son’gyauq neix, son-gyauq cibngeih ngoenz, swnjcienz le gij dinfwngz guh aenvenz Myauzcuз.



▲ Boq aenvenz miz vunz swnj laeng.



▲ Saefouh aenvenz cingq mbongq conggh aendaej aenvenz.